



**Äntwert vun der Madamm Justizminister Elisabeth Margue op d'parlamentaresch Fro n°1643
vum 10. Dezember 2024 vum honorabelen Députéierten Dan HARDY zum Sujet "Agressions
contre le personnel pénitentiaire"**

1) Wéi huet sech d'Situatioun säitdeem entwéckelt? Wéi vill Virfäll gouf et tëschent 2018 an 2024?

Säit deene méi schlëmme Virfäll vum leschte Joer huet d'Situatioun sech nees berouegt, och wann d'Personal reegelméisseg verbalen Aggressiounen, Insulten a Menacen ausgesat ass. Et muss een dobäi awer ëmmer betounen, datt just eng Minoritéit vun de Prisonéier sech de konventionelle sozialen Ëmgangsforme schlecht upasse kann. E groussen Deel vun de Leit stellen allgemeng kee Problem a kee Risiko duer.

D'Evolutioun vun de Virfäll vun 2018 bis 2024 ass déi hei:

- Virfäll am **Centre pénitentiaire de Luxembourg**:

2018: 3 Aggressiounen géint Membere vum Personal, 4 Tentatives d'agression géint Membere vum Personal, 1 Virfall wou e Member vum Personal gestouss gouf.

2019: 5 Aggressiounen géint Membere vum Personal, 3 Tentatives d'agression géint Membere vum Personal, 1 aggressiivt Buehuele géint e Member vum Personal, 1 Virfall wou e Member vum Personal gestouss gouf.

2020: 10 Aggressiounen géint Membere vum Personal, 2 Tentatives d'agression géint Membere vum Personal.

2021: 11 Aggressiounen géint Membere vum Personal, 2 « coups et blessures » géint e Member vum Personal, 3 Tentatives d'agression géint Membere vum Personal.

2022: 17 Aggressiounen géint Membere vum Personal, 2 Virfäll wou e Member vum Personal gestouss gouf, 1 « coups et blessures involontaires » géint e Member vum Personal, 6 Tentatives d'agression géint Membere vum Personal.

2023: 8 Aggressiounen géint Membere vum Personal, 2 Virfäll wou e Member vum Personal gestouss gouf, 1 « coups et blessures involontaire » géint e Member vum Personal, 1 Tentative d'agression géint Membere vum Personal.

2024: 2 Aggressiounen géint Membere vum Personal, 3 Virfäll wou e Member vum Personal gestouss gouf.

- Virfäll am **Centre pénitentiaire d'Uerschterhaff**:

2023: 3 Virfäll wou e Member vum Personal gestouss gouf, 3 Virfäll wou op e Member vum Personal gespaut gouf, 5 Virfäll während Interventiounen, 1 weider Tentative vun engem vun deenen ernimmte Virfäll.

2024: 2 Virfäll wou e Member vum Personal gebass gouf, 2 Virfäll wou op e Member vum Personal gespaut gouf, 2 Virfäll wou e Member vum Personal gestouss gouf, 2 Virfäll während Interventiounen, 4 Tentative vun engem vun deenen ernimmte Virfäll.



- Virfäll am **Centre pénitentiaire de Givenich:**

2018: 1 Virfall

2019: 0 Virfäll

2020: 0 Virfäll

2021: 1 Virfall

2022: 3 Virfäll

2023: 0 Virfäll

2024: 2 Virfäll

2) Ass déi aktuell Formatioun, déi dem Personal zur Verfügung steet, ausräichend, fir sech kënnen an esou Situatiounen ze wieren? Entsprécht d'Formatioun deene reelle Bedierfnesser um Terrain? Wann net, wier et net de Moment, fir déi Formatioun ze iwwerschaffen? Wat sinn déi Haaptelementer, déi dobäi méi berécksiichtegt misste ginn?

An der Basisformatioun léieren d'Stagiairen d'Grondkonzepter vum Beruff vum Agent pénitentiaire. D'Formatioun bestinn, ënnert anerem, haut schonns aus Modulle wéi Self-defense, psychologesch Desescalatioun, professionellt Handelen an och Gestiou vum Konflikt am Strofvollzuch. Ab 2025 soll och all Agent pénitentiaire eng Ausbildung an der Handhabung vum Peffergel kréien.

3) Wéi gëtt d'Gewaltbereetschaft vun den Insassen ageschat? Si verschidde Gruppen, respektiv Nationalitéite méi tendenziéis gewaltbereit? Wier et méigleg, weider preventiv Moosnamen ze huelen?

D'Agente vum Service psychosocial a socio-éducatif si speziell ausgebild fir d'Gewaltbereetschaft vun de Prisonéier unhand vum psychologeschen Tester a spezifeschen Instrumenter ze evaluéieren an eng adaptéiert Prise en charge unzebidden, fir dat Verhalen en vue vun enger Resozialiséierung ze änneren.

D'Analys vun de Virfäll ergëtt keen Zesammenhang tëschent der Gewaltbereetschaft an enger spezifescher Nationalitéit. Dat, wat sech bei der Analys vun de Virfäll feststelle léisst, ass, datt et oft nees déi selwecht Prisonéier sinn, déi duerch hir Gewaltbereetschaft opfalen an dat onofhängeg vun hirer Nationalitéit.

Den Artikel 29, Paragraf 1, vum Gesetz vum 20. Juli 2018 iwwert d'Prisongsverwaltung gesäit vir, datt den allgemenge Regimm an de Prisongen de « régime en commun », also dee vum Zesummeliewen an der Gemeinschaft, ass. Dëse « régime en commun » entsprécht de Standarde vun engem moderne Strofvollzuch an de Länner, déi der „Déclaration universelle des Droits de l'Homme“ an de Konventioun vum Conseil de l'Europe adheréieren. D'Virfäll sou wéi d'Aggressiounen an d'Klappereie fanne prinzipiell ëmmer an der Gemeinschaft statt. Well et awer méi schéiwer ass, fir an deem Kader nach zousätzlech präventiv Moosnamen ze huelen, baséiert d'Prisongsverwaltung sech op den Artikel 29, Paragraf 2, vum Gesetz vum 20. Juli 2018 iwwert d'Prisongsverwaltung, fir, fir eng limitéiert Zäit, verschidde problematesch Prisonéier aus der Gemeinschaft erauszehuelen.



4) Wat sinn déi direkt Konsequenze fir d'Insassen, déi gewalttäteg ginn?

D'Gesetz gëtt dem Prisongsdirekter d'Méiglechkeet ee Prisonéier, deem e Sécherheitsrisiko duerstellt, op Basis vum Artikel 30 vum Gesetz vum 20. Juli 2018 iwwert d'Prisongsverwaltung, fir maximal 24 Stonnen direkt an eng Sécherheitszell ze placéieren. Géint dës Decisioun huet den Detenu d'Méiglechkeet e Recours beim Direkter vun der Prisongsverwaltung ze maachen.

E Prisonéier, dee sech engem schlëmme Virfall schëlleg gemaach huet, riskéiert och eng Disziplinarmoossnam, an, deemno wéi schlëmm de Virfall war, kann den Direkter vun der Prisongsverwaltung ee Placement an den « régime cellulaire », sou wéi et am Artikel 29 vum Gesetz virgesinn ass, ordonnéieren. Géint dës Decisiounen kann den Detenu e Recours virun der Chambre d'application des peines maachen.

All gewalttäteg Virfäll gi systematesch, op Basis vum Artikel 23, Paragraf 2, vum Code de Procédure pénale, beim Parquet denoncéiert.

Lëtzebuerg, den 15. Januar 2025.

D' Justizministesch

(s.) Elisabeth Margue